

unius, quod continuo aqua tingunt, ut flexibilius sit, & majori impetu cadat. Licitum Viris plures ducere Vxores, quarum unam domi retinent, cæteras varijs in locis disponunt. Adulteros extremo afficiunt supplicio. In Urbibus nullum Lupanar, omne Meretricium genus in Suburbia relegatur. Nuptialia Festa celebrant tempore Novilunij, & fere Martio Mense, qui dies illis primus est ineuntis anni. Hæcque Festa peragunt uti apud nos, splendide & magno apparatu. Per multos dies continuos convivium celebrantur; Organis musicis Ludisque Histrionicis adhibitis. Sunt autem Chineses plerique facie lata, barba rara, naso simo, oculis parvis: etsi quidam inter eos sint forma satis decora. Color omnibus ut Europæis: subfuscus autem ijs qui circa Canton habitant. Rarissime vel numquam Patrio excedunt Solo, neque facile peregrinum admittunt, imprimis ad interiora Regionis: nisi fide publica a Rege fuerit donatus. In comestationibus & comportionibus adeo strénuos se exhibent, ut ipsis Germanis aut Belgis ne minimum quidem cedant. Quod ad Religionem hujus gentis attinet, credunt omnes res creatas, omniaque inferiora, atque horum gubernationem pendere a supernis, atque Cælo: quem maximum omnium Deorum credunt, eumque primo Alphabeti caractere exprimunt. Solem, Lunam, & Stellæ adorant, etiam Cacodæmonem, (quem ea forma qua nos Europæi depingunt) ne mala ipsis inferat, ut ipsi dicunt. In Mechanica omnis generis conficienda supellectile adeo dextri & nitidi Chineses, ut opus a natura creatum, non manufactum videatur. Ars Typographica & Tormentorum bellicorum usus hic adeo vetus est, ut inventorem nesciant. Lusitani multa de sagacitate horum Hominum scribunt, & hoc (quod imprimis stuporem moveat) quod curribus utantur veliferis, quos sic dirigere sciunt, ut ijs quocunque velint brevissimo temporis spatio terra ferantur. Figulina illa opera pellucida, niveque candidiora, quæ apud nos in pretio sunt, & *Porcellana* dicuntur, nequaquam hoc loco silentio prætereunda. Ea apud hos fiunt hoc modo. Cochleas quasdam marinas ovorum testis miscent, aliaque quædam addentes, subigunt & massam conficiunt. Hanc sub terra condunt, ibique eam macerari ad octuagesimum vel centesimum usque annum sinunt, hæredibusque suis pretiosi thesauri loco relinquunt. Ipsi que ea utuntur quam Avi Atavique poluere. Observantque ex veteri instituto; ut qui veterem tollit, recentem ejus loco recondat. Mercimonia hic maxime vigent Aromatum & imprimis Serici. Ex Malacca enim, Bengala & alijs locis Piper, Crocus, Noces odoratæ, vulgo Muscatæ, Casia & id genus Aromata in Chinam non exiguo quæstu advehuntur. Sed Sericæ Telæ hic præcipuum mercimonium est. Ioannes enim Barrius in suis Decadibus Asiaticis scribit ad urbem Nimpo quam alij Liampo nuncupant, observasse quosdam ex Lusitanis trium mensium spatio, navigio evectas 166000 Serici libras. Muscum quoque hinc ad varias Orbis partes devehî, asserit Antonius Pigafetta: & Rhabarbarum & Vniones Andreas Corsalis.

*Mores.**Opificia.**Mercimonia.*